

§. III.

REVELATIONES PATRIARCHIS AC
JUDÆIS FACTÆ.

XXIV. In hoc miserationis statu, ad quem per Protoplasti peccatum devoluti sumus, spiritui adversus carnem continuo præliandum foret; quodque tristissimum accidisset, gloriosus bellorum exitus sperari haud potuit. Verum adfuit illico humano generi Creator providus, atque ipsos iam *Adami filios* et *nepotes* ad religionem ac moralitatem benevole educavit.

XXV. Invalescente postmodum hominum plerorumque perversitate, DEUS primo *Noachum*, dein *Abrahamum*, *Isaacum*, *Jacobum* ceu instrumenta conservandæ veræ religionis elegit; eosque novis revelationibus, instructionibus et promissionibus dignabatur.

XXVI. Aucta et in gentem excrescente Israelitarum familia novum genus œconomix ingressus DEUS, statum civilem religioni iungens, THEOCRATIAM constituit, atque novi huius instituti *Mosen* designavit auctorem.